

448  
L 276



















W 448 L 276

DIDERICI SIXII  
AMSTELODAMUM.

Habita Amstelodami

ORATIO,

*In Auditorio Illustris Athenæi Majore,*  
*IV. Kal. Feb.*



AMSTELODAMI,  
Apud JOANNEM RIEUWERTS, Urbis & Athenæi  
Typographum, clc lcc LXXXXII.



DIDERICI SIXII  
AMSTELODAMUM.

Habita Amstelodami

ORATIO

In Auditorio Illustris Aulicæ Majore

IV. Kal. Feb.



AMSTELODAMI  
Apud JOANNEM RIEUWERTS, Urbis & Aulicæ  
Typographum, cl. 1688.



Nobilissimis, Illustrissimis  
hujus Civitatis  
CONSULIBUS,  
A C  
CONSULARIBUS,  
Nec non  
Amplissimo Urbis  
SENATUI,  
*Salutem ac Perpetuitatem.*



Ustinet hæc qualiscunque Ora-  
tio, Nobilissimi & Amplissimi  
Viri, vestra sibi splendida nomina  
inscribere, materiæ ipsius fiducia;  
quibus enim potius hujus urbis de-  
dicari laus possit, quam vobis, V. A. qui ei  
præestis? accedit, quod dicenti mihi Ve-  
stro



stro imprimis jucundissimo ac suavissimo con-  
spectu animum ad inceptum opus peragen-  
dum non mediocrem iniecistis, & curren-  
ti quodammodo calcar, quod ajunt, addidistis.  
Quem certe honorem tam insignem, non  
agnoscere neque sentire, insulsum plane &  
ingratum videri possit. Accipite igitur Nobi-  
lissimi & Amplissimi Viri, pro humanitate  
vestra, quæ insignis semper erga studia fuit,  
benevolo animo hanc meam Orationem, &  
æqui bonique consulite, quod Vobis summa  
animi submissione & observantia offert,

*Amplitudini Vestrae*

Addictissimus, devotissimus

DIDERICUS SIX.

DL



# DIDERICI SIXII

AMSTELODAMUM.

**C**ogitanti mihi, Auditores, ac sæpius mecum  
volventi, dum in studio literarum & elo-  
quentiæ verfor, & aliquod vobis, si non  
ingenii, at industriæ certe & diligentia, exhibere specimen gestio, quodnam po-  
tissimum, quod & à mea persona, & ab hoc ipso, cui insistimus, loco non alienum, & vestro omnino favore non indignum esset, eligerem argumentum, nulla mihi aut idonea magis aut illustrior visa est ad dicendum materia, quam, quæ ultro se offerebat, & in oculos incurrebat quodammodo, communis hæc Patria nostra, & hoc ipsum, quod premimus, natale solum. Etenim si illius amore ac desiderio naturali tene-  
mur omnes: si nihil Patria dulcius, cui & ipsam immortalitatem ille Homericus, quam promittebat ei Calypso, posthabuit senex: non mirum profecto aut insolens videri cuiquam debet, si eodem, quo ille, quo omnes, affectu tangar itidem ego atque commovear. Quod si nostros parentes è quibus lucem vitam hausimus, ut amemus ac diligamus, & ratio suadet, & naturale jus flagitat; quonam Patriam nostram, omnium nostrum parentem, cui vitam & spiritum,  
A cui



cui nos ac nostra debemus omnia, quonam illam, inquam, amore complecti vicissim decet? Et si eos præcipue liberos, qui diliguntur à parentibus maxime, suos item parentes amare quam plurimum par est, quid facere illos oportet, quos, præter communem hunc spiritum, communis omnium parens, peculiari quadam benevolentia, & amore prosequitur singulari? Hæc ego mecum dum reputo, Aud. & patriæ meæ amorem, ac præclara ejusdem merita apud animum meum recoligo ac recognosco, ingratus certe, aut indignus his ipsis videri possim, si non agnoscerem beneficium illud atque sentirem. Quare, cum ex hac urbe sim ortus, & iis ortus parentibus, quos non cives illa tantummodo, sed & rectores esse civium voluit; & boni civis, & hominis non ingrati fore existimavi, si illius ipsius urbis in laudes exspatiarer, & eo, quo possum modo gratum meum erga illam animum testificarer. Etenim quis Amstelodamum laudaverit justius, quam Amstelodamensis? Ubi convenientius, quam Amstelodami? Quis jure majore, quam beneficio singulari obstrictus? Quis opportuniore in loco, quam ad studia Oratoria ista destinato, inaugurato? Sed quid ego majus meis viribus mihi onus impono; aut ea de urbe sustineo dicere, de qua, uti de Carthagine, siliere præstat, quam paucis absolvere. At nec is, qui hæc dixit, de Carthagine siluit, nec meum hunc qualemcunque conatum, aut civitati huic nostræ rubori,  
aut



aut vobis Aud: ingratum futurum spero. Et voluntas laudatur interdum, & magnis sæpe ausis excidere pulchrum est. Sed nec ego de urbe clarissima, quæ dici de illa possent, dicturus sum hodie omnia, & summa rerum fastigia, ac quædam tantummodo capita delibabo. Quid, quod nec pro merito illa laudari à quocquam possit? Quid, quod ipsa pro me intercedit & quodammodo tacita loquitur, Juvenilis ætas, quæ, si ulla alia, venia certe vestra Aud. & benevolentia non indigna censi debet. Quod si Athenas aut Romam, Syracusas aut Babylonem, aliasque clarissimas urbes suo celebrasse præconio, viris olim clarissimis laudi & gloriæ fuit; cur meam mihi patriam celebranti, & hoc celeberrimum orbis emporium meo, ut possum, præconio extollenti, aut vitio quisquam, aut dedecori vertendum putet? Quocirca adeste animis, qui adestis corporibus, & omnem mihi timorem, quem & materiæ dignitas, & audientium incussit auctoritas, evellite, quæso, & eradicate. Vos autem præcipue, ad vos enim potissimum mea pertinere videtur oratio, Amplissimi Coss. principes Civitatis, qui gravioribus curis sepositis ad has minores descenditis, vos, inquam, viri Amplissimi, oro ego atque obsecro, uti ingenii mei mediocritati, quæ scio quam sit exigua, consueta vobis humanitate succurrere, & de urbe vestra dicturum, ac sub gravi nimium pondere nutantem ac vacillantem vestro favore erigere, vestra con-



firmare præsentia ac sublevare dignemini. Tu vero, ô florentissimum, Bataviæ dicam, an Europæ emporium, Ocelle urbium, Amstelodamum, si nimium mihi sumere, si laudes tuas clarissimas meæ, si qua est, eloquentiæ imbecillitate deterere videor, Juvenili huic meæ audaciæ, & nimix forte fiduciæ ignosce, Mater, ignosce, & amore tui peccantem, & quasi circa matrem ludentem, ac more infantium balbutientem, ut matrem facere par est, fove, sustine, corrige, & si amorem tuum meruero, tuo me amore complectere.

Sed quid ego primum, quid secundum, quid tertium in tanta materiæ copia, & rerum amplissimarum abundantia dicam? Rem ab origine repetam, & ut creverit, ut adoleverit civitas, & ad id ætatis, ad hoc honoris tandem ac gloriæ culmen pervenerit, ea, quâ potero, brevitate vobis, Aud: ob oculos ponam, ut ejus prima initia, amplitudinem, majestatem, in brevi velut tabella intueri possitis.

Primi urbis conditores & incolæ, uti Romæ pastores, sic hujus nostræ piscatores fuere, qui ad Damum Amstelæ forte confederant, & ab utriusque nomine nomen urbis formaverant; anno post Christum millesimo ducentesimo tertio. Habitabat hanc regionem, & suo regebat imperio, clarissima isto ævo ac nobilissima Amsteliorum familia, quorum in annalibus celebre & decantatum est nomen; qui cum vario, & tanquam anniversario, implicarentur cum finitimis bello, affli-



afflictata miserandum in modum & devastata est civitas ; quæ ejusdem sæculi tamen anno circiter sexagesimo brevi rursus convaluit , & quasi de novo effloruit. Anno deinde quartidecimi sæculi secundo & octogesimo , in urbis se formam erigere , & contra adjacentium incursiones muro se tueri cepit. Immensum vero deinde incrementum sumpsit , & pomœrii sui fines , anno insequentis sæculi quinto & octogesimo , extendit & amplificavit. Longius deinde ac latius eodem illos limites propagavit anno istius sæculi tertio & nonagesimo , & fossis atque aggeribus se ipsa munivit. Sed & isti angusti nimium termini , nec tam arcto se includere spatio ac circumscribere potuit urbis majestas , quare sua rursus pomœria dilatavit , anno currentis sæculi duodecimo. Verum ut hætenus alias ita se ipsam tandem superavit amplissima civitas , & quarta demum vice atque ultima , hujus sæculi anno octavo & quinquagesimo , in omnes ubique partes sese diffudit atque dispersit , & latissimo ac spatiosissimo ambitu circumsepsit , & firma tandem in sede ac stabili sese collocavit.

Sita est urbs nostra in ipso Amstelæ Yæque confinio , quorum ille mediam dividit , hic suis alluit fluctibus , uterque piscium genera , varia atque diversa , magna suppeditat copia ; opportuno valde & commodo in omnes oras ac regiones navigantibus loco. Mirabile certe loci ingenium est , omnium non minus stupore ,

A 3.

quam.



quam quod superstructum, dignissimi. Nam & infirmum ac limosum est solum, quod palis demum impactis ad sustinendas domos idoneum redditur, & in ipsis paludibus, & in medio veluti mari posita ac fundata est civitas, ut non sine divino miraculo, & Dei providentia singulari istuc potissimum collocata esse videatur. Et sane tantam huic loco rerum omnium copiam atque abundantiam indulgit Deus, tot opes atque divitias in urbis sinum congeffit, ut non nisi ejus numine stabilita, ejus præsidio aucta & amplificata videri possit, quæ exiguo temporis spatio in varias terrarum oras navigando, & mercaturam ubique feliciter exercendo, in tantum honoris & gloriæ, in tantum potentiae ac majestatis ascendit fastigium, ut non finitimas tantum, sed & celeberrimas Europæ urbes æquarit aut superarit, & in omnem terrarum orbem, in omnes gentes ac nationes nominis sui famam & amplitudinem disseminarit. Nec vero est dubium quin cura Dei Peculiaris hanc urbem nostram respexerit, qui ex ipsis eam undis eduxit, qui sterile & infrugiferum solum, frugiferum reddidit, & terræ vitium maris fecunditate correxit; qui, cum frumentum, nec vinum, nec oleum haberemus, illud tamen ipsum aliunde refarciit damnum ac compensavit; ut aliæ passim gentes nobis veluti arent, nobis serant ac metant, & in nostrum quasi commodum germinent; nos vero, rerum omnium inopes, rerum omnium copia, & affluentia abundemus.

Quod



Quod si jam interiorē penitus contemplari civitatem libet, nihil nisi splendidum atque magnificum, nihil nisi augustum ac regium, & urbis majestate dignissimum, nihil nisi opes atque divitias & rerum omnium splendorem atque abundantiam conspiciemus. Quid de fossis ac propugnaculis, de portis ac mœnibus, de spatiosis per urbem plateis, de foris & arcibus; quid de pulcherrimis ædificiis illis, regiis vere palatiis, quibus ipsam provocamus Italiam; quid de templis ac turribus, quibus in cœlum videmur adscendere; quid de operibus publicis, quæ passim & ubique comparent, & immensis illis molibus dicam, quibus tamquam gemmis distinguitur, ac præ reliquis aliis urbibus, suo sane jure ac merito superbit hæc civitas? quis aut eorum numerum recensere, aut uniuscujusque, pro rei præstantia, dignitatem & magnificentiam digna satis oratione complecti possit? Nulli tantum est flumen ingenii, nulli tam divinum & incredibile dicendi genus, qui tantum sibi promittere audeat; nedum ut id ego tentare, aut ullo sane modo aggredi velle sustineam. Sed quamquam Apellem, aut si quid eo est excellentius, Venus ista desiderat, non gravabimini, opinor, tamen, si quædam horum attigero, & rudi veluti penicillo adumbrare studuero. Quis enim te indictam prætereat, ô domus publica civitatis, quæ in celeberrima urbis parte fulgenti ac candenti marmore tuo omnium te intuentium atque admirantium oculos mentesque



tesque præstringis, ô longe dignissima hujus urbis magnitudine Curia? quis ad exteriorem illam pulchritudinem tuam ac majestatem; quis ad interiorem magnificentiam, & omnem illum ornatum & apparatus; quis ad ampla & spatiosa conclavia; quis ad immensa laquearia; quis ad signa, picturas, emblemata; quis ad pavementum marmoreum; quis ad reconditas illas, & quas non ostendis, divitias; quis ad hæc, inquam, omnia non summa admiratione perculsus hæreat & obstupescat? Te alterum Capitolium, te octavum orbis miraculum, te principum vere confesum, te legum ac justitiæ vindicem, te perfugium omnium civium, te libertatis conservatricem, te robur ac nervum Reipublicæ jure merito dixerim. Jam vero superbam illam in vicinia porticum, & spatiosam istam mercantium aream, quo pacto aut præterire, aut ullo eam modo silentio involvere possum? Hæc est celebris illa per totum terrarum orbem Amstelodamensium destinata negotiantibus area, quam tot gentes ac nationes calcant ac terunt quotidie; ad quam tanquam ad publicum quendam & communem mercatum omnes undique populi certatim veluti confluunt, atque concurrunt. Hic emitur orbis, hic venditur. Hæc civitatem condidit, hæc eadem auxit, amplificavit, & ad istum gloriæ & dignitatis apicem extulit: hæc eandem illam conservat, & utilem suis, terribilem exteris, omnibus venerabilem reddit. Hanc ego  
sc-



feminarium civitatis, subsidium Reipublicæ, orbis universi conventum, & quoddam quasi compendium citra invidiam appellarim. Insignem autem illam & potentem domum, quæ in ultimam Indiam usque, & extremum Orientem Imperii sui terminos propagavit; aut illam itidem alteram quæ in ultimum Occidentem suas extrudit merces, suas educit Colonias, quo pacto aut non prædicare, aut quibus potius verbis prædicare aggredior? quis illarum mercimonia explicet, quis opes ac divitias numeret, quis potentiam celebret? quis pro rei denique majestate commemoret, aut digno extollat præconio duo ista firmissima Reipublicæ fulcra atque columina? Quid de amplissimo rei maritimæ præfectorum palatio? Quid de horum aut rerum Orientalium Curatorum splendidis illis ac plane Regalibus ad res navales & bellicas ædificatis horreis atque custodiis? Quid de armamentario publico, omni instrumento bellico ornato atque instructo, cui ipsæ invidere possint Venetiæ? Quid de navium fabricatione, & de immensis illis machinis bellicis; quid de reliquis in longum ac latum porrectis, & ante urbis sinum prætentis, onerariis dicam? Pulcherrimum sane spectaculum, & cui per universum terrarum orbem vix simile, ut putem, extet, aut secundum. Quid cætera porro ædificia publica, quibus abundat hæc civitas, complura itidem ac magnifica persequar? Quid innumera illa ad Dei cultum & ad veram Religionem propagandam excitata per

B

urbem



urbem loca? Quid illa quæ non mercaturis & mercibus, sed artibus ac disciplinis, & Bonæ Mentis mercatui sunt consecrata? Quid illa, quæ senibus, ægrotis, pauperibus, & utroque parente privatis infantibus, decrepitis item mulierculis destinata sunt passim, ædificia dicam, an palatia? Misericors populus vocabantur olim Athenienses. Jure longe potiore isto nos nomine censendi sumus. Illi aram Misericordiæ erexerunt: nos ereximus templum.

Verum ut non in domibus & ædificiis, sed in civibus & hominibus eam constituentibus consistit potissimum civitas, & ut vere olim Themistocles, patriam municipes esse, dixit, non mœnia, ita non tam e muris & mœnibus, & augustis suis palatiis, e lignis, inquam, & faxis, quam e civibus, & incolarum industria ac diligentia censerī hęc nostra debet, qui vita sunt civitatis, ut ita dicam; & anima. Tanta certe horum industria hominum & vigilantia, a primis urbis initiis ac fundamentis fuit, tanta item parcimonia atque frugalitas, & jam parta servandi & amplificandi cura semper ac cautio, ut vix ulli rei, quam isti, si humano more loqui velimus, ortum & incrementum, & immensam illam, in quam excrevit postea, amplitudinem ac majestatem, acceptam referre debere videatur hęc civitas. Nam ab ipsis statim initiis, & ab eo continuo tempore, qui in urbem assurgere cœpit, piscatura primum rem modicam; loci dein usi commoditate, per mare vicinum Australe,



strale, & loca circumjacentia, mox item per Boreale, longius paulatim & latius, suis volitarunt navigiis, & sua mercimonia exponendo, alia rursus comparando, & invehendo, lucri non parum fecerunt, & commodi. Quod ubi non infeliciter succedere sibi viderent, eandem viam insilendo, eadem maria exercendo, alia insuper aperiendo, mercaturis & negotiationibus suis rem & privatam & publicam brevi temporis spatio auxere non mediocriter. Postquam vero, sub hujus initium sæculi, utcunque bello impliciti, duro & diuturno, ut Hannibalico bello Romani, in diversa respicere ausi, longinquas etiam regiones cogitare cœperunt, neque Siciliam, Sardiniam, Hispaniam, ut olim illi, finitimas ipsis regiones & circumjacentes, sed in ultimam Indiam, & auro illas divites insulas, classem miserunt, & nobilissimam illam in Oriente Coloniam erexerunt, fundarunt, & omnis generis mercimonia, & incognitas his regionibus gazas in sinus ac portus nostros onustis orientis præda navibus intulerunt, & aureo veluti imbre, vel largissimo flumine potius urbem suam irrigarunt; insigne exinde incrementum sumpsit, ac brevi interposita pace, & duodecim annorum induciis, in eam excrevit altitudinem civitas, quam habere conspiciatis hodie. Quæ post viginti annorum intercapedinem tamen favente ac blandiente successu, deducta in Occidentem Colonia, & occupatis Hispanorum præfidiis, terrorem nominis sui longe lateque circum-



tulit, & adductis inde divitiis ac mercimoniis pluribus, atque Argentifera hostium classe, duce Heynio, occupata, & aureo illo vellere per Jafonem nostrum reportato, suam dignitatem & gloriam, suas res & fortunas immane quantum amplificavit. Quid de navigationibus reliquis, per universum terrarum orbem; quid de Australi Incognita, & detectis per nostros homines terris; quid de Groenlandia, Nova Zembla, & ultimo Septentrione commemorem? ubi per marium ac ventorum incommoda, per nives ac grandines, per altissimos glacierum montes, ultra anni & Solis vias, & præscriptos a Natura terminos, Naturam ipsam quasi expugnarunt, & Novum terrarum Orbem, quod hætenus incredibile videbatur, sua nostri industria, & rei maritimæ experientia recluserunt, & suis exinde posteris patefecerunt. Dies me deficeret, & patientia vestra, Auditores, abuti velle viderer, si singula enumerarem. neque enim hujus horæ angustia, & unius ambitu orationis comprehendere omnino possunt terræ ac regiones, quas suis navibus obierunt, suo labore & vigilantia detexerunt, hujus incolæ civitatis; qui Tyriis & Carthaginiensibus, & quicquid in hoc genere habet, quo gloriari possit, Antiquitas, palmam sane & gloriam, sua navigandi peritia, & rerum maritimarum scientia, longe omnibus præripuerunt.

Sed ne in hisce tantummodo rebus, utcunque magnis, & ad vitæ humanæ usum summopore necessariis, eos.



eos excelluisse credatis, etiam manu egregios, & bello strenuos, etiam acres ingenio & in pluribus artibus ac disciplinis, & in omni fere doctrinæ genere claros atque eximios, produxit hæc civitas viros. Quid de Nekkiis, Lonkiis, Haniis, & de fortissimo illo, qui reliquorum est omnium instar, Jacobo Heemskerchio dicam? Hic est ille Novi Orbis detector, Novæ Zemblæ repertor; hic ille, qui in Austrum, in Orientem complures feliciter navigationes suscepit, & opima inde spolia reportavit; Hic ille, qui validissimam Hispanorum classem in ipso Freto Herculeo, Herculeæ planè est aggressus audacia, & ad Gades fortissime dimicans victoriam suis reliquit; hic ille, cujus obitum defleverunt illustrissima ejus ævi ingenia, & versibus suis pulcherrimis honestarunt; hic ille, cujus marmoreo, satis pro istius temporis frugalitate conspicuo & sumptuoso, superbimus etiamnum sepulchro. Quid de viris eruditione præstantibus, & de claris porro ingeniis dicam? Nam ut Nicolaum, Henricum, Johannem, Amstelodamenses; ut Allardum, Sartorium, Krokium; ut Kamium, Everardum, Oconem, & utrumque Opmerium; quorum alii insignes Theologi, alii rursus Medici, alii Scholarum hujus urbis rectores, alii etiam Consules extitere; ut eos omnes omittam, quis Theodorum Volkardum Kornhartium, subtilis ingenii virum; quis Martinum ædituum, aut Elardum Verium fando non audivit? Quis Henricum Laurentem Spigelium, quem



Batavorum Ennium ; quis Roemerum Vischerum , quem Martialem Hollandicum dixeris ; Quis præclarum illud ac & ab ipsis Musis Gratiis veluti confectum , ingenium Gerbrandum Adrianum Brederodium , quem Plautum , quem Aristophanem nostrum , merito appellaris ; quis præclaros illos & illustres viros , quis , inquam , vestrum ignorat ? Quid de Sebastiani Egberti , viri Consularis ; quid de Petri Pauwii , Professoris Leidenfis ; quid de Fortunati Plempii præclaris in rem medicam ac litterariam meritis ; quid de Petro Cornelio Hoofdio , Mudensi illo Satrapa , dicam ? Libet hic subsistere paululum , & dotes Viri eximias , ac singulares plane virtutes , accuratiore aliquantulum oculo contemplari. Nescio sane , sitne vir iste satis unquam æstimatus , satis a quoquam intellectus. Hic enim est ille , Aud. qui scriptis & operibus suis clarissimis , præstantissimis , quam aut splendore natalium , aut nobilissimo illo , quo functus est munere , multo fuit illustrior : hic ille , cui non hæc civites tantum , & hoc illi natalitium solum , sed & omnis hæc patria nostra , & universa Batavorum Respublica , quid dico Respublica , imo & exteræ gentes ac nationes plurimum debent : hic ille , qui linquam hanc Belgicam nostram ita semper excoluit , auxit , ac perpolivit , ut illius quodammodo conditor videri possit. Testis est nobilissimum illud , & omnium admiratione dignissimum opus , quo gentis nostræ Historiam & Batavorum res gestas septem &

vi-



viginti complexus voluminibus est, stilo ita nervoso, ita terfo, ac consummato, ut nesciam an apud ullas alias gētes extet quicquam præstantius. Testis est domus Medicea, cujus illustres ærumnas, splendorem & amplitudinem, eleganti Syntagmate consignavit. Testis Henricus est Magnus, Rex ille Regum clarissimus, cujus iste res gestas, quæ magnitudinem illi nominis peperere, & omnes tum belli tum pacis artes, ac Regias vere virtutes, eximio ac longe pulcherrimo comprehendit scripto, quo & singularem Regis favorem, & ordinis ab eo Equestris promeruit dignitatem. Sed nec istos intra se terminos potuit continere divinum illud ingenium, & incredibili quodam Musarum amore a prima statim adolescentia conflagravit, quo in genere scriptionis ita excelluit, ut optimos ævi sui Poëtas aut æquarit aut superarit, & Historicorum non magis princeps habeatur, quam Poëtarum. Clamant id ejus Tragædiæ, clamant ejusdem Comædiæ, clamant Amatoria carmina, complura item & diversa diversi generis alia, pulcherrima ac perfectissima, & genium sui Authoris, pondus ac majestatem, & nescio quam in dicendo peculiarem huic viro gravitatem spirantia omnia. Accedit civilis prudentia & singularis ejusdem in gubernando & administrando scientia, quam tum in universa Historia, & in iis quæ soluta oratione conscripsit ipse, tum in iis quæ convertit ex aliis, ubique summam ostendit. Quin & Cornelium

Ta-



Tacitum, gravissimum certe scriptorem ac prudentissimum, ut ad illius se normam componeret, & suam ipse Historiam scriberet, quod incredibile videri possit, bis & quinquagies totum perlegit: quin & suum in usum transtulit universum, & continuo eum legendo,volvendo, ac convertendo ita sibi familiarem reddidit, ita feliciter mox eundem expressit, ut illi sit factus simillimus, & alter merito Tacitus haberi possit. Quapropter, uti Horta Junio, Alcmaria Nannio, Harlemum Scriverio, Nordvicum Doussis, Leyda Heynsio, Haga Secundo, Delphi Grotio, Rotterdamum Erasmo, ita Petro Cornelio gloriatur hæc civitas Hoofdio. Verum ut hos ipsos produxit, cives suos & alumnos, sic alios rursus invitavit hæc eadem, & in sinum suum pellexit omni eruditione conspicuos & illustres viros; atque hoc Musarum sacrarium, hoc Bonæ Mentis delubrum, in civium suorum usum simul & commodum, hujus sæculi anno secundo atque tricesimo, Senatus urbis amplissimus excitavit, quod Gerardus Johannes Vossius, in omni doctrinæ genere consummatissimus, Casper item Barlæus, Philosophus ac Poëta clarissimus, David deinde Blondellus, Alexander Morus, doctissimi ac disertissimi, viri nominis sui fama celeberrimum reddiderunt. Quid de publica dicam Bibliotheca? quid de sectionibus Anatomicis destinato loco? Quid de spatioso illo & amæno Civitatis, Horto, omni genere plantarum, toto orbe conqui-

ta-



tarum, omni arborum genere ornato atque referto? Quid de Urbis Theatro, in pauperiorum subsidium, & ad honestam animi remissionem excitato, Musarum illo nostratium Athenæo? Mirari sæpius libet Aud. quare, cum apud alias omnes Hollandiæ urbes jaceant planæ ac frigeant Poëtica studia, tam fecundam hæc civitas semper protulerit segetem Poëtarum. Quid autem id aliud est, nisi hoc ipsum, quo ardent homines nostri, Dramaticæ Poëseos studium, & hæc ipsa, quam frequentant, Palæstra? Hic Poëtas audiunt, hic Poëtæ fiunt. Hinc, ut Trojano ex equo milites, multi semper ac præclari prodierunt vates. Huic Costerum, Vossium, Brantium, & complures insuper alios; huic Principem Poëtarum, & cum Barlæo, cum Hoofdio, cum ipsis Veteribus comparandum, Justum debemus Vondelium, magnum ac diuturnum, non Patriæ magis suæ, quam hujus ipsius urbis, quam Patriæ habuit loco, decus & ornamentum.

Sed, ut in urbe cives, sic in civibus eminent Magistratus, splendor urbis, præsidium civitatis, & publici quidam civium suorum Parentes; quibus, si ulla civitas alia, certe hæc nostra gloriari potest; ejusmodi enim nacti Magistratus sumus, qui cum rei studeant publicæ, & saluti urbis communi, concordia, Libertati, Religioni animum intendant omnes, alii tamen alias urbis, ut ita dicam, ac negotiorum communium partes peculiari quodam sibi modo curandas exornandasque suscipiunt.

C



piunt. Hic juris excellit scientia, hic Medicæ rei peritia, hic arte gubernandi Respublicas, & civili prudentia, hic litterarum amore, hic rei Geographicæ ac maritimæ cognitione, hic Philosophiæ studio & scientiis Mathematicis. Huic viarum & arborum, illi exonerandarum per urbem aquarum assignata provincia est. Duo fuerunt semper, quæ objicerent nobis peregrini, crassitudo aëris, & aquarum graveolentia, quæ mirum semper in modum fædarunt ac contaminarunt pulcherrimam civitatem. Ab altero sereniores ut videtur soles, ab altero prudentissimi nos Consules liberarunt. Nolo quenquam in os laudare, sed quonam te piaculo prætereire hoc loco possum, Huddeni amplissime, qui artibus tuis Mechanicis & pulcherrimis illis ad Yam operibus non splendorem huic Urbi dedisti & dignitatem, sed vitam, sed animam? Quare te non immerito, Vir Ampliss. amamus, colimus, & ut Civitatis hujus Archimedes suspicimus, qui immisissis ac regeffis denuo per cataractas aquis, pro stagnantibus mobiles, pro turbidis liquidas, pro fætentibus, nihil odoris exhalantes effecisti, & liberiolem nobis omnibus spiritum, ac salubriorem halitum reddidisti. Adeo ut hac ipsa civitate nostra tam pulchrum in modum exornata, ac suæ quodammodo sanitati reddita, & his ipsis plateis ac fossis, limpidis eas undis intersecantibus, & vernantibus illis arboribus, ad undarum marginem consitis, ædificiorum amplissimorum pulchritudinem augmentibus, commendantibus, nihil omni-

no



no pulchrius alibi ac speciosius, nihil usquam ornatius videri possit.

Cæterum cum ad laudem urbis ac commendationem nihil magis pertineat, quam quod inexpugnabilis sit & invicta, & contra machinas hostium atque insultus suo se situ defendat, ita hac quoque in parte sibi ipsa consuluit, & sua se fortitudine invictam quodammodo reddidit hæc eadem nostra. Nullis enim machinis Bellicis circumveniri, aut ullo milite neque à mari, ubi se ipsis undis, neque à terra, ubi se inundatione, & earundem aquarum eluvie, tuetur atque defendit, nulla denique opera atque industria aut capi à quoquam facile aut circumvallari queat. Sic ut eadem illæ, quæ ab utroque civitatem latere alluunt, quæ perfluunt eam passim atque discriminant, & variis illis diverticulis suis recreant atque oblectant, eandem quoque ipsam invictam hostibus nostris & inexpugnabilem præstent, hæc, inquam, ipsæ, quibus innitimur, quibus undique cingimur, ac circumfundimur, aquæ, ejusdemque sint urbis & pulchritudo simul & fortitudo.

Quod si principibus & illustribus Viris non displicuisse gratum omnino privatis atque jucundum est, nonne eodem illo honore urbes ac civitates jure sane potiore gloriari possunt? Quo quidem nomine, si ulla alia, hæc certe se nostra commendat: quæ variis ac diversis immunitatibus, commodis, privilegiis, & ipsius etiam urbis Insignibus per Albertum, Margaretam, Maxi-



milianum, & alios item Principes, ob singularem in eos amorem, constantiam, fidem, obtentis & impetratis, inter reliquas Hollandiæ civitates eminet atque excellit, & præ cæteris aliis omnibus jure quodam suo superbit.

Quamobrem, cum non sine miraculo positam, non sine Numine auctam & amplificatam, & in summam altitudinem ac majestatem eductam, tot præclaris ædificiis & operibus exornatam, tot gnavis & industriis, tot fortibus, tot eruditis civibus gloriantem, tot virorum illustrium prudentia ac sapientia gubernatam, administratam, situ ipso munitam ac propemodum insuperabilem, multis præterea commodis ac privilegiis ornatam à Viris Principibus & honoratam, fortiti sumus civitatem; nonne felices ac fortunati jure quidem nostro & merito, censerî profecto debemus, qui pulcherrimam hanc urbem incolimus, qui in eadem nati sumus & educati, quibus sub æquissimo sapientissimorum virorum regimine in hac suavissima Patria nostra dulcem omnino & tranquillam, jucundam ac fortunatam, & ab omni tumultu remotam traducere vitam licet?

Quæ cum ita se habeant, Auditores, quid restat aliud, quid, inquam, aliud restat, quoniam, quo adscendat, non habet, quam ut in eodem tenore, & perpetuo illo, quem habuit hætenus, cursu felicitatis, maneat porro civitas ac perseveret? Faxit Deus ille immor-



mortalis, hujus urbis Conditor ac Conservator, qui ab exiguis illam initiis ad immensam hanc magnitudinem ac dignitatem evexit, qui plurimis eam malis, & gravissimis belli periculis eripuit, explicavit, & in hodiernum hunc diem salvam nobis atque incolumem præstitit: Faxit Deus ille Optimus Maximus, ut idem hic rerum status proprius sit illi ac diuturnus; & nullo externo hoste, nullis dolis atque insidiis, nullis item tumultibus appetita, suum illud imperium, & conservatam hæcenus Libertatem, Religionem, salutem, & fartam tectam in hoc usque temporis incolumitatem, conservet porro ac tueatur hæc civitas: & ab hujus anni initio, in multos etiam alios, ac plura insuper sæcula, finituum hoc brevi sæculum subsecutura, spargat atque disseminet; & ad feros olim nepotes, atque ultimæ posteritatis memoriam transferat sempiternam.





# DIDERICO SIXIO.

## I.



Onsulis ô magni magna & præclara Propago,  
Cui se nostra negat vena pusilla parem.

Dignior, ô Juvenis, docti quem Musa Maronis,  
Quem celebret numeris Naso Poëta suis.

Ardenti Patrem coluit quia pectore, toto

Aeneæ canitur nomen in orbe pium.

Tu Patrem, Patriosque simul quâ laude Penates,

Quâ pietate colas, vox tua testis adest:

Vox tua, quæ Batavas longe lateque per oras

Amstelium spargit nomen, itemque tuum:

Vox tua, quâ, Patriæ cum divulgaret honorem,

Creditus es Pylum Tu similasse senem.

Tanta tuis comitem junxit se gratia verbis,

Tantus & in gestu fulsit, & ore decor.

O amor! ô cultæ soboles facunda Minervæ!

O amor! ô Patris gloria multa tui!

Ille suos quantum cives supereminet omnes,

Tu linguâ socios, ingenioque, tuos.

Plaudimus attoniti Juvenum Tibi turba virumque:

Applaudit Patrum docta corona Tibi.

Et nisi constrictum glacialia vincla tenerent,

Plauderet è mediis Amstela lætus aquis.

ABRAHAMUS LAKENS.

## II.



## II.

**D**Um gravi fundis modulamen ore,  
 Et quatis magni Ciceronis arma,  
 Stemma primorum memorans, & ortum,  
 Amsteliorum;

Ducimur cuncti sequimurque, SIXI,  
 Verba fundentem bene culta linguam,  
 Qualiter clarum cithara secutæ  
 Orphea silvæ.

Quid prius dicas, Juvenis diserte,  
 Laudibus terræ solitis Paternæ?  
 Qua nihil lustrat melius sereno

Phœbus ab axe?  
 Vidimus natam tenui sub ortu;  
 Vidimus muros, generose SIXI,  
 Oppidi ductos avibus secundis

Terque quaterque.  
 Hic, velut quondam veteri sub ævo  
 Atticâ sedem posuere terrâ,  
 Vidimus sedem posuisse docti

Montis alumnas.  
 Cujus os unquam calamusve possit  
 Patriæ laudes celebrare terræ  
 Rectius, quum Tu, generate docto  
 Consule SIXI?

NICOLAUS VEEKENS:

## III.



## III.

**O** Mnes writ amor Patria. cum civibus urbem.  
 Hinc merito laudas, Consule nate, tuam.  
 Ingenio tua vox respondet; dextera voci;  
 O quam facundum dant tua verba sonum!  
 Amstela, dives opum, tellus tibi Patria, gaudet  
 Ornata sese laudibus esse novis.  
 O, Decus Amstelidum, populi praesonia grati  
 Extollent nomen tempus in omne tuum.

CHRISTIANUS COCQ.

## IV.

**F**acundus Juvenis plus quam juvenilia praestat,  
 Urbis dum Patriae nomina clara refert.  
 Quis Patriae melius poterit praesonia terrae  
 Dicere, quam PATRIÆ filius iste PATRIS?  
 Ecce premit Patris vestigia passibus æquis  
 Filius, & vera est Patris imago sui.  
 Consule te tandem quoque gaudeat Amstela, SIXI;  
 Utque Parens, Patriae sis decus ipse tuæ.

J. v. DOORESLAAR.

## V.

**L**audavit Patriam facundo SIXIUS ore;  
 Hoc opus, hoc unum credidit esse sibi.  
 Falleris at, SIXI: tria conjunguntur in uno.  
 Laudasti Patriam, Teque, Patremque simul.

MATH. van HARTOGVELT.











